

## Pippi Langstrumpf è Pippi Socalunga

■ (cp) Radio e Televisiun Rumantscha (RTR) e la Lia Rumantscha (LR) preschantan in ulteriur disc cumpact (DC) cun las aventuras da Pippi Socalunga. Il giu auditiv è gist pront 100 onns suenter la naschientscha da l'atura Astrid Lindgren, ils 14 da november 2007. Suenter che RTR ed RR han preschentà avant in mais las produziuns da DC da 1 fin 3 da la seria «Top Kids», vegn uss «Top Kids, vol. 4» sin fiera. Sin quel disc san ils uffants tadlar ils emprims trais chapitels da las aventuras da Pippi Socalunga.

Pippi Socalunga fascinescha già dapi onns uffants sin l'entir mund. Ils films èn daventads classichers. Ed uss finalmain datti las aventuras da Pippi, da Tommy ed Annika era per rumantsch. «Pippi va a star en la Villa Babilonia», «Pippi daventa tschertgarauba e fa part d'ina baruffada» e «Pippi fa gieus da tschiffar cun policists». Quai èn ils trais emprims chapitels da Pippi. En il decurs da l'onn proxim suondan anc dus ulteriurs discs cun las aventuras da la matta ord la «Villa Babilonia».

Ils 14 da november 2007 èsi precis 100 onns dapi la naschientscha da l'atura e mamma da Pippilotta Victualia Rollgardina Menta, figlia dal chapitani Efraim Socalunga. Astrid Lindgren è l'atura svedaisa da cudeschs d'uffants la pli conuschenta sin l'entir mund. Malgrà ch'ella ha pir entschet cun 37 onns a scriver istorgias, datti pli che 70 cudeschs dad ella e quai en almain era tants linguatgs.

**Il disc pon ins pustar tar RTR ubain tar la Lia Rumantscha a Cuira.**

**[www.simsalabim.rtr.ch](http://www.simsalabim.rtr.ch)**

**[www.liarumantscha.ch](http://www.liarumantscha.ch)**